

- मुख्यमंत्री वृक्षारोपण महाअभियान रे तैत आज जयपुर संभाग मांय लगायी ज्या कोई दस लाख पौधा-लोकसभा अध्यक्ष ओम बिरला कोटा मांय कर्यो पौध रोपण।
- मुख्यमंत्री भजनलाल शर्मा कह्यो के किणी प्रदेश री संपूरण उन्नति रो आकलन फगत भौतिक विकास नी बल्कि नागरिकां मांय मानवीय मूल्यां अर विचारां री समृद्धता ऊं होवे है।
- प्रदेशभर मांय आज मोहर्रम रा पर्व मांथे हजरत इमाम हुसैन री शहादत ने अकीदत रे साथै कर्या जावे याद।
- राज्य मांय न्यारी-न्यारी ठौड़ां रूक-रूक ने बिरखा रो दौर चाले-आवता दो-तीन दिन मांय दक्षिणी राजस्थान मांय मॉनसून री सक्रियता रा आसार।

000

मुख्यमंत्री वृक्षारोपण महाअभियान रे तैत आं दिनां प्रदेशभर मांय पौध रोपण कर्यो जावे। ई कड़ी मांय शिक्षा विभाग कानी ऊं आज जयपुर संभाग मांय फगत तीन घंटां मांय ई कोई दस लाख पौधा लगायी ज्या। संभागीय आयुक्त डॉक्टर आरुषि मलिक बतायो के पौध रोपण रे पौधां री देख-रेख री जिम्मेदारी ई इण ऊं जुड्या अहलकारां ने दीरीजी है।

बालोतरा जिला मांय ई आज जिला परिवहन दफतर समेत केई ठौड़ां पौधा लगायी ज्या।

000

लोकसभा अध्यक्ष ओम बिरला आज आप रा संसदीय हलका कोटा बूंदी रा एक दिन रा दौरा मांथे है। ई दौरान वणा "एक पेड़ मां के नाम अभियान" रे तैत कोटा रा वल्लभबाडी मांय पौधरोपण कर्यो। कार्यक्रम मांय श्री बिरला मौजूद लोगां ऊं मां रे नाम एक पौधो जरूर लगावण री अरज करी। न्यारी-न्यारी संस्थावां अर सामाजिक संगठनां रा नुमाईन्दा ई पौधरोपण कार्यक्रम मांय हिस्सो लियो। ई मौके श्री बिरला कह्यो क कोटा जीवत शहर है। अठे लोग सामाजिक, राजनीतिक रूप ऊं जागृत है। अबे पर्यावरण रे प्रति जाग जगावणी हैं वणा कह्यो के कोटा अर बूंदी जिला मांय 11 लाख पौधा लगाया जायेला। श्री बिरला कह्यो के जलवायु बदलाव रा असर ने रोकण सारू आपा ने जीवन शैली ने पर्यावरण रे दाई बणावणी व्हेला।

000

मुख्यमंत्री भजनलाल शर्मा कह्यो है के किणी प्रदेश री संपूरण उन्नति रो आकलन फगत भौतिक विकास ऊं ई नी, बल्कि वटां रा नागरिकां मांय मानवीय मूल्यां अर विचारां री समृद्धता ऊं ई होवे है। श्री शर्मा आज डीडवाना-कुचामन जिला रा लाडनूं रा जैन विश्व भारती मांय न्यारा-न्यारा विकास कामां री नींव धरी। ई मौके वणा कह्यो के मानवीय मूल्यां ने बधावो अर विकास मांय संता रो महान योगदान रह्यो है। भारत भूमि ऐडा लोगां ने जन्म दियो है, जो युग रे साथे ई नी बल्कि युग ने आप रा बहाव रे साथे ले गया।

आचार्य श्री तुलसी ऐडा ई महापुरुष हा। वणा अणुव्रत आंदोलन री मार्फत मानव धर्म ने व्यावहारिक स्वरूप लोगां रे सामी राख्यो अर समाज ने अंध विश्वास, रूढ़िवादिता अर पूर्वाग्रह ऊं मुक्त कर्या। कार्यक्रम मांय केन्द्रीय मंत्री अर्जुन राम मेघवाल अर केई जनप्रतिनिधि मौजूद रह्या।

000

जम्मू-कश्मीर रा डोडा ज़िला मांय आतंकवादियां साथै मुठभेड़ मांय वीरगति ने प्राप्त व्ह्या झुंझुनू ज़िला रा दोन्यू जवानां रो राजकीय सम्मान रे साथै आज वां रा पैतृक गांवां मांय अंतिम संस्कार करी ज्यो। जवान विजेन्द्र सिंह री अन्त्येष्टी वां रा पैतृक गांव डुमोली कलां मांय व्ही जठे घणी तादाद मांय गांवां वाळां वां ने भावपूरण श्रद्धाजलि दी। वठे ई अजय सिंह रो अंतिम संस्कार भैंसावता कलां मांय करी ज्यो। ई दौरान गृह राज्य मंत्री जवाहर सिंह बेढम मौजूद रह्या।

000

युवा कार्य अर खेल मंत्री मनसुख मांडविया कह्यो है के देश रा नौजवान भविष्य रा नीति निर्माता है। वणा कह्यो के सरकार न्यारी-न्यारी योजनावां अर कार्यक्रमा री मार्फत नौजवाना रे सशक्तिकरण सारू प्रतिबद्ध है। केंद्रीय मंत्री आज नुवी दिल्ली मांय राष्ट्रीय युवा अर राष्ट्रीय सेवा योजना ईनाम जीतण वाळां साथै बतळ करी। ई दौरान श्री मांडविया आज जतावता कह्यो के नौजवानां री बदलाब लावण रा बूतां ऊं देश प्रगति अर नवाचार कानी बध रह्यो है। कार्यक्रम रो मकसद ईनाम जीतण वाळा री कामयाबीयां री खुशी मनावणो अर मेरा युवा भारत मंच ने और बत्ती उपयोगी बणावण माथे चर्चा करणो हो। युवा कार्य अर खेल मंत्रालय मुजब बतळ रो महताऊ हिस्सो मेरा युवा भारत मंच नौजवानां रा रचनात्माक जुड़ाव सारू नुवी अर सहयोग रा विचारां माथे केंद्रित ही। डॉ. मंडाविया ईनाम जीतण वाळां ऊं मंच ने और बत्ती संवाद परख बणावण रा बारा मांय सुझाव माग्यां।

000

केन्द्र सरकार संसद रा बजट सत्र ऊं पैला दीतवार ने सगळां दलां री मीटिंग बुलायी है। बैठक रे दौरान सरकार संसद रा दोन्यू सदनां रा सुचारू संचालन सारू सगळां राजनैतिक दलां ऊं मदद री अरज करेला। बजट सत्र ई मीना री 22 तारीख ऊं 12 अगस्त तांई चालेला। केन्द्रीय बजट 23 जुलाई ने पेश कर्यो जायेला। ओ नरेंद्र मोदी सरकार रा तीजा कार्यकाल रो पैलो बजट व्हेला।

000

हजरत इमाम हुसैन अर वां रा साथियां री शहादत री याद मांय आज मुहर्रम रे मौके प्रदेश भर मांय न्यारां-न्यारां धार्मिक कार्यक्रम व्हे रह्या है। राज्य री न्यारी-न्यारी ठौड़ां ताजियां रा जुलूस निकाळ्या जावे। सिंज्या वां ने सुपुर्द ए खाक कर्या जायेला। राजधानी जैपर मांय कोई साढे तीन सौ छोटा-मोटा ताजिया बणायी ज्यो है। अ ताजियां जुलूस रे साथे बड़ी चौपड़ ऊं व्हेता देर सिंज्यां तांई करबला पूगेला। प्रशासन कानून अर यातायात बन्दोवस्त बणाया राखण सारू खास इन्तजाम कर्या है। हिफाजत सारू आरएसी री 6 कंपनियां लगायी ज्यी है। जोधपुर मांय ई मोहर्रम रीत मुजब मनायी जावे। नीमका थाना रा पाटन मांय मोहर्रम रो जुलूस मातमी धुनां रे साथे निकाळी ज्यो। चूरू मांय ई ताजियां निकाळ्या जावे। ई दौरान मार्ग मांय केई ठौड़ां पीवण रा पाणी री छबील लगायी ज्यी। बूंदी अर बालोतरा मांय मुस्लिम समुदाय हजरत इमाम हुसैन री शहादत री याद मांय मातमी धुनां साथे ताजिए निकाळ्या। ई दौरान मातमी धुनां रे साथे नौजवान करतब ई दिखाया।

000

देव शयनी एकादशी रे मौके आज प्रदेशभर मांय केई धार्मिक कार्यक्रम व्हे रह्या है। ई मौके पुष्कर रा पवित्र सरोवर मांय घणी तादाद मांय श्रद्धालु स्नान कर ने मिंदरां मांय पूजा अर्चना करी। वठे ई कोटा ज़िला मांय देव शयनी एकादशी रे मौके खास पूजा अर्चना करी ज्यी अर दान पुण्य करी ज्यो। जैसलमेर ज़िला मांय रामदेवरा मांय एकादशी रे मौके देश रा न्यारा-न्यारा हलकां ऊं आया श्रद्धालु बाबा री समाधि रा दर्शन कर्या। संवारा ऊं बाबा रामदेव समाधि समिति कानी ऊं श्रद्धालुआं ने आराम रे साथे दर्शन करावण सारू सगळां इन्तजाम करी ज्यो हा। डूंगरपुर मांय वन यात्रा रो आयोजन करी ज्यो।

शहर रा वनेश्वर महादेव मंदिर मांय श्रद्धालुआं भजन कीर्तन करता चोखी बिरखा रे कामना रे साथै जात्रा निकाली। ध्यान जोग है के आज ऊं रीत मुजब चातुर्दश मास रे दौरान ब्याहव, गृह प्रवेश, मुंडन, जनेऊ जस्या शुभ काम बन्द व्हे जावेला।

000

प्रदेश मांय मॉनसून री बिरखा रा दौर रूक-रूक ने चाले। मौसम केन्द्र जयपुर मुजब लारला 24 घंटां मांय सब ऊं बत्ती 12 सेंटीमीटर बिरखा बांसवाड़ा रा सज्जनगढ़ मांय दर्ज व्ही। मौसम केन्द्र जयपुर मुजब आज जयपुर, कोटा, भरतपुर, अजमेर, उदयपुर संभागां मांय केई ठौड़ां अर बीकानेर अर जोधपुर संभाग मांय कुछ ठौड़ां मेह होवण री आस है। मौसम केन्द्र रा निदेशक डॉ. राधेश्याम शर्मा बतायो के आवता दो-तीन दिन राजस्थान रा दिखणाद हलकां मांय मॉनसून बणयो रहवेला।

000

रेलवे सुरक्षा बल-आरपीएफ लारला 7 सालां मांय रेल्वे टेशणा अर रेलों मांय खतरां मांय पड़या 84 हजार 119 टाबरां ने बचाया है। ऑपरेशन नन्हे फरिश्ते' रे तैत आरपीएफ भारतीय रेलवे रा न्यारा-न्यारा जोन मांय अभियान रा रूप मांय ई सामाजिक काम ने अंजाम दियो है। अ बचाव काम टाबरां री हिफाजत सारू आरपीएफ री प्रतिबद्धता ने दर्शावे है। साल 2020 मांय कोविड महामारी रा चुनौतीपूर्ण हालात रे बावजूद आरपीएफ 5 हजार 11 टाबरां ने बचावण मांय कामयाब री। आरपीएफ आप री कोशिशों ऊं नी फगत टाबरा ने बचाया है बल्कि घर ऊं भाग्यां अर गुमीज्या टाबरां री दुर्दशा रा बारा मांय जाग ई बधायी है। ध्यान जोग है के आरपीएफ मुक्त करायी ज्या टाबरां ने जिला बाल कल्याण समिति ने सौप देवे है। जिला बाल कल्याण समिति टाबरां ने वां रा माँ-बाप ताई पूगा देवे है।

000

प्रदेश मांयां न्यारा-न्यारा हादसा मांय तीन टाबरां समेत चार लोगां री मौत व्हे गयी। उदयपुर रा फतहनगर हलका मांय आज दो टाबरां री बरसाती नाळां मांय डूब जावण ऊं मौत व्हे गयी। अ टाबर आप रा घर ऊं खेत मांय जा रह्या हा। जाणकारी मिलण माथे पुलिस गांवा वाळां री मदद ऊं टाबरां ने बारे काड ने ईलाज सारू मावली अस्पताल भेज्यां जठे डॉक्टर वां ने मृत ऐलाण कर दिया। वठे ई धौलपुर रा गड़रपुरा गांव मांय पाणी रा कुण्ड मांय तीन टाबर डूब ग्या। आ मांय ऊं दो ने लोगां हिफाजती बारे काड लिया जद के एक टाबर री मौत व्हे गयी। झालावाड़ जिला रा मोरियाखेड़ी ढाबला गांव मांय आकाशीय बिजली पडण ऊं एक बुजुर्ग री मौत व्हे गयी।

000

स्वास्थ्य अर परिवार कल्याण मंत्री जेपी नड्डा देश री फार्मैसी ऑफ द वर्ल्ड रा मान रे अनुरूप एक विश्व थर रा दवा नियामक ढांचा ने बणावण माथे जोर दिया है। वणा उत्पादकां ने ऊंची गुणवत्ता तैय करण सारू दवा अर चिकित्सा उपकरण उद्योग रे साथै बरोबर बतळ माथे ई जोर दियो। श्री नड्डा आज दवाया, सौंदर्य प्रसाधनां अर चिकित्सा उपकरणां रा विनियमन माथे एक समीक्षा मीटिंग करी। वणा कह्यो की दवायां रा उत्पादक अर निर्यातक रा रूप मांय देश, विश्व थर माथे अगाड़ी है। इण रे अनुरूप वणा केन्द्रीय औषधि मानक नियंत्रण संगठन-सीडीएससीओ माथे वैश्विक मानकां ने हासिल करण सारू बगतसर एक रोडमैप तैयार करण माथे जोर दियो।

000